



ISIL-i par lenir Abu Hussein
al-Qurashi asüba sangdongogo

Manoj Tiwary cricket asaya
nungi anenba sangdongogo



Manipur azüdokshi: Tasü mang melenteptsü asü ngdanga lir

Imphal, Luroi/august 04 (TYO): Manipur nung Kuki nung aser Meitei nung nisung tasü mang melenteptsü All Manipur United Clubs' Organisation (AMUCO) ajanga asü ngdanga lir.

Iba osang ya AMUCO tir Nando Luwang-i Imphal nung Hukulbarnü metetdaksü.

Manipur nung Kuki aser Meitei kin anaprong nungi nisung tasü mang district balala nung aliba mozü kidang mashishi yua lir.

Manipur nung Meitei aser Kuki nung tsü ngta azü dokshitepba nung nisung 150 dak tema takum samaogo.

Meitei nung tasü mang ya Kuki telungpur ket aser Churachandpur district hospital nung lir aser Kuki nung tasü mang ya Imphal nung aliba

RIMS aser JNIMS morgues nung yua lir, ta Nando Luwang-i ashi.

Asürtem asoshi tatembang tepila sentong agitsü atema tekeratiba nung kin ana tsü ngta tasü mang melenteptsü, aser ibaji ajanga Manipur nung kin ana tsü ngta yimjung tanaben alitsü, ta pai ashi.

Churachandpur district hospital morgue nung nisung tasü mang 35 lir aser ibai Kuki nung eri amokbanger aliba district ka lir.

Hokulbarnü tashinung valley district temnung aliba RIMS aser JNIMS hospital nung tribal pur nisung tasü mang 53 yua lir.

"State-i tekeratiba nung yimjung aginera, sorkar telok kata dena madentsüla aser sepaitem nem par mapa inyakdaksütsüla," ta Luwang-i ashi.

Gol aser PM-i temolung agü ja Manipur tebilemstsü bentettsü la: NESO

Kohima, Luroi/August 04 (TYO): Manipur nung tang tensa mejungi aliba bentettsü asoshi Government of India aser Ato Kilonser-i nendaka inyaksü la, ta North East Students' Organisation (NESO) tongti zülur Mutsikhoyo Yhobu-i tanü ashi.

Kohima nung tawa raksaba Naga Club building indang NSF Conference Hall nung osangbener den jembidang Yhobu-i ashiba agi, August 1-3, 2023 anogotem Manipur-i North East Students' Organisation (NESO) Goodwill Mission aodang Manipur nung security forces 40,000 dak tema aliba

ngutet saka tensa azü oksü asoshi parnoki temolung magü tsür.

"Security forces ya yimti tiyong nung dang lir saka parnok yimyak-yimtsü ng nung temolung magü tsür, kong kin balala tsü ngta mepetmesü adoka lir," ta pai ashi. Manipur nung azü dokshi tenzü ker ita asem jungogo, saka Ato Kilonser-i tang tashi sangdong kecha agü ja mali, anungji Manipur nü bur timtemba central sorkari sü oki ia magiba sayur, ta Yhobu-i sasaseta ashi.

Centre-i temolung agü tsü asü bo Manipur nung tensa azü okteter lila, ta pai ashi.

(Maneni tapak 8 nung...)

Nagabazar Panchayat Hall cum Parking semzükogo

Kohima, Luroi/August 04 (TYO): Chief Executive Officer (CEO), Kohima Smart City Development Limited (KSCDL), Kezhazhou Theü no-i Hokulbarnü Nagabazar Panchayat Hall cum Parking semzükja liasü.

Nagabazar Panchayat Hall cum Parking atema work order ya March 31, 2022 nü agü tsü aser iba ki ya electrification, water supply & sanitary fittings aser rain water harvesting reservoir densema sen crore 2.30 agi renemtsü lemsü tsü, ta pai ashi.

Smart City Projects kü bok project balala inyakba indang jembidang, mission period ya June 2023 nung renemtsü liasü saka Ministry of Housing and Urban Affairs (MoHUA) ajanga tang teinyakdak project tem renemtsü asoshi ano küm ka atsü langja liasü, ta pai ashi.

June 2023 tashinung Smart

Cities Project 100 nungi shilem 74 shi renemogo aser shilem 26 ano merenem aser iba atema mapang apuloktsü ogo, ta pai ashi.

KSCDL kü bok project tem ya March 2024 tashinung renemtsü imlar aser Smart City mission mapang temogo, Kohima Smart City assets/ki o jen tem anepalutsü aser ketdangtsü atema Kohima Municipal Council (KMC) nem agü tsü tsü, ta pai ashi.

Work order nung aliba ama mapang shidak aser sen shidak agi Nagabazar Panchayat renemba asoshi tenü ngasang agü ja jembidang, final payment agü tsü sü len Nagabazar Panchayat, KSCDL aser KMC tsü ngta Smart City mission guidelines nung aliba ama revenue lemsatsü asoshi Operational & Management atema MoU zülupteptsü, ta pai ashi.

(Maneni tapak 8 nung...)

Shillong nung Ao Senso Telongjem küm 25 jungogo



Padmashree Wb.T.Senka Ao ; Ao Senso Telongjem Shillong tenzü ker küm 25 ajungba Silver Jubilee sentong tenzü kba sentong nung Jubilee choiri ken atenba noksa nung angur. (August 4,2023)

Shillong, August 04 (TYO) : Shillong nung Ao Senso Telongjem tenzü ker küm 25 ajungba jubilee mung sentong tanü August 4 nü yangi Naga Community hall nung akhi tenzü kertem densema kanga temunrangtsüka aser longsulongtsüka tenzü kgo.

Iba sentong nung 'Aor Puti' onük nung jembidang, "Aor puti tamendakdakji nü bortemi mulungba nung yimsü asuba (Democracy), senso ajak temeten kasa (classless society), teburtemi senmang amangba (patriachal society), kinungtsü ka dang agiba (monogamy), tebang o agidang ken o rezü nga aruba (oral literature) , Tsü ngrem dak amangba aser nisung ser tanela alir ta amangbatem lir," ta Ao Milen nung taoba yimozülur aser Padmashree Wb.T.Senka Aoi metetdaksü.

"Nü bor ajungai mulunga agizü ker asü ngteta akhi mapang nungi benshia aruba dang puti ta ajar," ta paisa ratettsü.

Aotsürtem sobaliba aser libaliro indang ashidang, 'tanü

asü ngbo Aotsürtemi ali senmang amangtsü akoker, kechiyong tetsürtemi inyakba aser yariba nungia ali rongsen ajangzü ker, saka akhi tetsü tebou nungi amanga aruba ali sangmangbo tetsürtemi amangtsü makoker,' ta paisa ashi.

"Tanü tetsürtemi pei kinungbo tenü ng aser kidong agi pei tenü ng aser pei kidong kü mer amshiba nung timtem adoktsü, kechiyong anojungi kinungbo ser ano tangar tebur keyii aotsü sa kü mra , ano khen tenü ng melentsü sa adoktsü," ta taoba T. Senkaia ashi.

Ao oshi renlok daksü tsü asoshi tebilemba ka lemsatepdang, "Arogo nung tanurtem school nung Ao oshi aser Ao ken jangraa sayutsü la aser Shillong ama bendanglen alir Aor kibongtem nung Ao oshi sapua jembitsü la," ta paisa ayongzü k.

Ao puti asü ngteta ayutsü atema, Aotsür Aoertem rongnung kasa kidong dang masü saka azü anasa aliba kinunger adianu den kibalembu masü tsü la ta T.Senkaisa nenshia metetdaksü.

Aor dak imlibilem aser taochi lir, Aorji awashi temetet aser teyarinü, anungji item putitemji mesamadaktsü tangaria ano asen Aor dak mulunglemteta alitsü sa Aortemia alitsü la ta paisa ajungshi.

Iba jubilee mung adener ajak pelaa agizü kba o ASTS tir Wb. (Dr) Temsünü ngsang i metetdaksü aser Naga Elders' Forum Shillong nungia tepela o jembia liasü.

Iba jubilee sentong nung samanirtem rongnungi tebu tedi Wb.Aren Imsong aser wb.Imkongsashi nati tepela aser tajungshi o jembi aser asür bilemtetba mapang Wb.Nokin Jamiri agia liasü.

Iba kasa jubilee mung sentong lapoka lanurtemi ken balaka aten aser tebutedi Pangiliba Imcheni Jubilee nü ngo kaket sayatsü . Iba sentong nungsa Jubilee choiri ken tajung ka aten. Iba sentong tenzü ka Shillong Ao arogo nung tetsür tesayula Wt.Alemla Jamiri sarasadem aser anük apang Rev.P.Muksiari sarasadema tembang. Iba sentong lenir Wb.Bendangkokba liasü.

Imphal East aser West district temnung khen atema curfew sala

Imphal, Luroi/August 04 (Agencies): Nü burtem nü ngdakba osettsü set lijaliyongtsü asoshi Manipur sorkari Imphal East aser Imphal West district nung ghonda tenet atema Hokulbarnep 5:00 ako nungi tenzü ka curfew khen atema salatsü telemtetba agia liasü.

Nü burtem chiyongtsü aser mozü densema tongtipang osettsü set alitsü atema iba mera ya agi.

Manipur nung kin ana tsü ngta region balala nung mepetmesü tenzü kshiba mapang curfew salatsü telemtetba ya agia liasü.

Tensa tali tamajungba akumba ajanga ketdangtsür temi district ana nungya curfew benoka liasü. Iba curfew yagi taoba mapang

sala aliba ajak alen. Ajisü aka nü burtem nü ngdakba ajiteta Hokulbarnep 5:00 ako nungi anü ngdang 12:00 ako tashi curfew sala.

Imphal East aser West indang district magistrate temi curfew salaba totuyuba agü tsü ba nung, chiyongtsü aser mozü densema tongtipang oset alitsü nü kjidong nung iba mera ya agi, ta shia liasü, aser iba yongji nü burtem achiajemtsü khuret ajema kumtsü.

Ajisü aka Manipur nung densa mejungi lir. State kü bok tesem balala nung rongrongshirong adokba osang lir, aser army aser RAF personnel temi Bishnupur district kü bok Kangvai aser Phougakchao tesemtem nung

tear gas amshia liasü. Lokti adenshiba nung tenokdangba agü ja aliba nung aibelena nisung tasü mang aremstsü asoshi tesem kati adenshitsü merangba nokdangtsü mechi iba mera ya agia liasü.

Iba mapang nisung 25 dak tema yirua liasü. Ano Imphal West district kü bok Senjam Chirang tesem nung prangbong agi khatepba mapang Manipur Rifles nungi zü ngsem ka takum sama aser ka yirua liasü.

Brehostibarnü Naransena, Bishnupur nung aliba 2nd Indian Reserve Battalion indang outpost ka nungi nok-nü aser injang-bomb rakzü kraktema bener aoba osang temai adokba sü len ano tensa tamajungba akum.

Posts department-i Dak Ghar Niryat Kendra (DNK) tenzüksü

Dimapur, Luroi/August 4 (TYO): State nung small aser medium business exporter tem nem teyari agütsütsü atema Department of Posts-i, Dak Ghar Niryat Kendra (DNK) ta nüngja agütsür facility tasen ka tenzüksüo.

Hokolbarnü osangbenertem den sensaksemba mapang Postmaster General of NE-II region, Som Kamei-i, DNK ajanga tilateri shishilembartem nem teyari agütsütsü, kechiyong post offices indang jenjang dalang structure aser inyakyim tongmelang ya small aser medium business atema kanga tapet lir ta ashi.

Paisa, DNK software teyari agia aser iba atema yanglua aliba web link ajanga customer temi online ajanga exports asüba

postal bills file sütettsü aser DNK mesüra post offices tem nung export shipments book asüba angutsü.

Tang DNK centre ya Dimapur, Kohima, Mokokchung, Phek aser Jalukie nung amenoka lir, koba inyaksangshi tenzükogo. Takhangba dak ajemdaker DNK centre tem ya tanga district headquarter tem nunga amenoktsü. Tang tashi nung state nungi exporter pongu DNK portal nung züngoksema lir aser tarutsü nung timba züngoksemtsü imlar, ta pai shisem.

Nisung ka ket nung GSTIN aser Import-Export certificate lira parnoki DNK website-i (<https://dak.cept.gov.in/customers.web>) login süa züngoksemettsü.

Mokokchung nung ak metsü-tsüba seminar ayongzüka agi

Dimapur, Luroi/August 4 (TYO): Survival Mokokchung sentong maneni tejakdai bener oa Kohima Ao Officertem Telongjem (KAOT) aser Chief A.H & Veterinary Office, Mokokchung na longjemer August 4 nü Conference Hall, State Poultry Farm Mokokchung nung Commercial Scale Pig Farming dak sendakba nung seminar ka ayongzüka kaogo.

Sentong nung shisalen sayurji Manoj kumar Basumatary liasü. Pa ya Symbiotic Foods Pvt. Ltd Tezpur Assam CEO aser North East Progressive Pig Farmers Association Founding President lir.

Technical session metenzük tsüngda Dr. Nemjemyanger Kubzari, Farm Manager, SCBF Aliba lenisüba nung sentong tatsüka agia liasü. Lokti pela agizükba o jembiba mapang Dr. B.M Sunep, CVO Mokokchung-i, ak metsüba dak sendakba nung tajangshiba aika bener aliba shisalen agütsür ka ket nungi

tangazükba angutsü ya district nung ak metsürtem atema maongka balaka lir, ta ashi.

Iba sentong nung KOAT züngsemtem rongnungi Nungsangwabang, Addl. Secy Planning Dept. Govt. of Nagaland (former V.President KOAT) Dr. Kika Longkumer, Joint Director Health & Family Welfare V/PKOAT, Senka Jamir Joint Director Horticulture dept nungeri shilem agia liasü.

KOAT sanenluden züngsemtemi, iba sentong ya local farmer tem nem tangazükba shitak agüja shishilembatsü asoshi rangloker inyaksangshitsü ajungmesotsü aser parnok ajungkettsü nükjidong nung ayongzüka agir ta ashi.

Technical session nung shisalen sayuri iba luyim nung pa tajangshiba lemsatepba den commercial pig farming dak sendaka aliba technical inyakyim balala aser district nung kodaser ak metsüba reloka aotsü iba indang tangazükba agüja liasü.

Kohima DC-i senden ayonger

Dimapur, Luroi/August 4 (TYO): Kohima Deputy Commissioner, Shanavas C IAS-i sangdong ka ajanga August 5 nü 12:00 ako nungi tenzükba DC Conference Hall, Kohima nung senden ka amentsü ta metetdaksüo. Iba senden nung taruba Independence Day anogomung atema mapalem balala asoshi

sensak asemtsü, ta DC-isa metetdaksü.

Independence Day sentong ya New Secretariat Plaza, Kohima nung ayongzüka amungtsü.

Iba dak sendakba nung ketdangsür ajak dang senden nung tamakok maludaktsüi arua shilem agitsü asoshi DC-i mepeshia metetdaksüo.

Moatoshi Longkumer-i Toll-free number lapoktsü



Dimapur, Luroi/August 4 (TYO): Advisor, Labour, Employment, Skill Development & Entrepreneurship Department, Government of Nagaland, Moatoshi Longkumer-i, August 4 nü Labour Commissioner office indang Toll-free number 18003090407 lapoktsüo.

nung mashiyimi anisatsü aser akoksatsü ana nung lir. Item mapa inyakterem ya timba kati parnok temeden dena memetet aser ibayongji parnok tebilemtsütem Department nem metetdaksütsü asoshia lenmang mongutettsü akok.

Anungji state nung item nisungtem tejangraba aser parnok ajangzükdaksütsü asoshi item ajak temulungdang yur Department-i Labour Department toll-free number (18003090407) ka lapoktsüo aser iba ajanga pei mapa inyakba tesem nungi phone call ka dang süa department den tongtepratepa pei tebilemtsütem lemsateptettsü.

Toll-free number ya Nagaland nung mapa inyakterem atema dang masü saka state adena orr aliba Naga nunger lanurtem shirnok pei

mapa inyakba tesem nung tebilemtsü lir parnok asoshia lir.

Toll-free number ya Nagaland nung aliba mapa inyakterem den tesendaktep ajungkettsü aser service balala agütsütsü asoshi Department-i agiba jenjang ka lir.

Kija aser lokti shirnokisa department dak sendakba nung ken o ashishiner mesüra tebilemtsü lemsatepner parnoki toll-free number ajanga benoktetsü. Iba facility ya 24 x7 inyaksangshitsü.

Ajisüaka call tembo office lapokba anogotem nung 0900 nungi 1600 Hrs PM tashi nung dang agizüka jembitsü. Helpline number ya mapa minyakba mapang aser anogotem nungbo 'auto-record' mode nung alitsü aser ken o tem ajak junga mangaoka yur mapang inyakba anogotem nung bentettsütsü.

State nung kümtem tsüngda urbanization, small-scale industry tem tanem tanemi renloka aoba, business establishments aser construction sector renloka aoba ajanga temelenshi adokogo. Ajisüaka mapa inyakterem timba mebenteti lir aser parnok kaketshisatsü peria maliba aser inyakyim prokshir aliba aser institutional back-up shitak maliba ajanga rongsenketzüng aser tanga lenla

nung mashiyimi anisatsü aser akoksatsü ana nung lir. Item mapa inyakterem ya timba kati parnok temeden dena memetet aser ibayongji parnok tebilemtsütem Department nem metetdaksütsü asoshia lenmang mongutettsü akok.

Anungji state nung item nisungtem tejangraba aser parnok ajangzükdaksütsü asoshi item ajak temulungdang yur Department-i Labour Department toll-free number (18003090407) ka lapoktsüo aser iba ajanga pei mapa inyakba tesem nungi phone call ka dang süa department den tongtepratepa pei tebilemtsütem lemsateptettsü.

Toll-free number ya Nagaland nung mapa inyakterem atema dang masü saka state adena orr aliba Naga nunger lanurtem shirnok pei

mapa inyakba tesem nung tebilemtsü lir parnok asoshia lir.

Toll-free number ya Nagaland nung aliba mapa inyakterem den tesendaktep ajungkettsü aser service balala agütsütsü asoshi Department-i agiba jenjang ka lir.

Kija aser lokti shirnokisa department dak sendakba nung ken o ashishiner mesüra tebilemtsü lemsatepner parnoki toll-free number ajanga benoktetsü. Iba facility ya 24 x7 inyaksangshitsü.

Ajisüaka call tembo office lapokba anogotem nung 0900 nungi 1600 Hrs PM tashi nung dang agizüka jembitsü. Helpline number ya mapa minyakba mapang aser anogotem nungbo 'auto-record' mode nung alitsü aser ken o tem ajak junga mangaoka yur mapang inyakba anogotem nung bentettsütsü.

Sep 29 nungi tenzükba 4th Brillante Piano Festival amungtsü

Kohima, Luroi/August 4 (TYO): 4buba Brillante Piano Festival, September 29 nungi October 1 nü tashi Capital Cultural Hall, Kohima nung amungtsü.

Iba osang ya Brillante Piano Festival, Founder Director Khyochano TCK-i Kohima Deputy Commissioner Shanavas C matsüngdang The Heritage, Kohima nung osangbenertem den sensaksemba mapang metetdaksü.

Brillante Piano Festival ya Yamaha Music India, Furtados Music India, Musee Musical Foundation, Kohima Music Conservatory, Task Force for Music & Arts, Global Music Institute, Nagaland Piano Teachers Association, Smart City Kohima, Music Academy Kohima, Sound Check NE aser Indian Delphic Council nunger longjemer ayongzüka amungtsü.

Iba sentong ya 2017 küm local community ajungkettsü

atema tenzük saka tangbo pan-India movement ka kümogo, ta Khyochano-i ashiba den Piano Festival ya linük nung music ecosystem nung teyari agütsür ka kümogo, ta shisem.

Sentong nung piano music genres balala sayatsü, ta laisa ashi.

Kasa mapang nung Nagaland nungi artists balala aser linük aser bendanglen nungi artist balalai shilem agitsü, ta laisa metetdaksü.

Anogo asem nikongtsütsü shia 5:00 ako nungi tenzükba concert agitsü aser anügdang mezüngbuba anogo tetoktepba semi-final round agitsü aser tanungba anogo ana nung workshop aser tanga sentong balala ayongzüka agitsü, ta lai metetdaksü.

Concert nung bendanglen nungi artist balala aser mata mabensartemia shilem agiba angutsü ta lai ashi.

India nung multi-genre piano

atema tenzük saka tangbo pan-India movement ka kümogo, ta Khyochano-i ashiba den Piano Festival ya linük nung music ecosystem nung teyari agütsür ka kümogo, ta shisem.

Sentong nung piano music genres balala sayatsü, ta laisa ashi.

Kasa mapang nung Nagaland nungi artists balala aser linük aser bendanglen nungi artist balalai shilem agitsü, ta laisa metetdaksü.

Anogo asem nikongtsütsü shia 5:00 ako nungi tenzükba concert agitsü aser anügdang mezüngbuba anogo tetoktepba semi-final round agitsü aser tanungba anogo ana nung workshop aser tanga sentong balala ayongzüka agitsü, ta lai metetdaksü.

Concert nung bendanglen nungi artist balala aser mata mabensartemia shilem agiba angutsü ta lai ashi.

India nung multi-genre piano



August 04,2023 nikongdang Naga Community hall, Shillong nung Ao Senso Telongjem Shillong pur Silver Jubilee sentong tenzükba noksa nung angur.



Ao Senso Telongjem Shillong Silver Jubilee nungo kaketi Tebu tedi Panglilba Imcheni sayatsüba noksa nung angur.(August 04, 2023).



August 04, 2023 nü New Delhi nung Parliament senden tagidak mapang BJP MP temi Mahatma Gandhi kürakyanglu anasa Karnataka sorkar anema longkak aitba noksa nung angur.

Rahul Gandhi tanaben Lok Sabha nung aniochtsü atema inyachtsüa akok

New Delhi, August 04 (Agencies): Tenüing menüchtsüba ken o ka nung Supreme Court-i Congress lenir, Rahul Gandhi maitsüi oshidang agütsüogo, anungji Lok Sabha-i pa tanaben MP aniochtsü atema maparen tenzüchtsüa akok.

Rahul Gandhi mesüra pa tenüing nung inyachtsür kati Supreme Court oshidang kuli copy ka Lok Sabha Secretariat ket nung agütsüba sülen pa Lok Sabha MP nungi anenja aliba agientsü atema maparen inyachtsü.

Taoba mapang Lok Sabha secretary general, P D T Achari-i, kodang secretariat-i Supreme Court tetuyuba indang copy ji ngudir parnoki Rahul anenja aliba agientsü atema maparen tenzüchtsü, ta metetdaksü.

Congress Rajya Sabha MP aser senior advocate Abhishek Manu Singhvi-i Rahul Gandhi atema Gujarat high court aser Supreme Court nung ken o jembija liasü. Singhvi-i, taoba mapang Congress Tir tekaraba nung tanaben MP agizüchtsü imlar,

ta ashi. Paisa, Hokolbar nungongdang tashi nungbo Supreme Court obendang indang kuli kaket angütsüa akok aser August 7 tashi nungbo Rahul MP aniochtsü akok, ta ashi.

Tenüing menüchtsüba ken o nung Gujarat court-i Rahul Gandhi aija küm 2 tepuokdak ayütsü atema obendang agütsüba sülen March 23 nü pa Lok Sabha züngsem nungi anenja liasü. Taoba election nung Rahul Gandhi-i Kerala kübok Wayanad menden nungi takok ngua liasü.

Hokolbarnü Supreme Court nung Justices- B R Gavai, P S Narasimha aser Sanjay Kumar nungeri akümba bench-i, Gandhi aitsüba mapang trail court judge-i kuli magütsü, ta metetdakja liasü. Iba sülen Lok Sabha nung Congress lenir, Adhir Ranjan Chowdhury-i Lok Sabha Speaker Om Birla ajurua pa dang tekaraba nung Gandhi Lok Sabha nung aniochtsü mepishiogo.

SC nung iba ken o jembidang Gandhi atema ken

o jembitsür, Abhishek Singhvi-i Justices B R Gavai, P S Narasimha aser Sanjay Kumar nunger dang, pa (Rahul) ya ozüing alema inyaker nisung ka masü aser BJP-i pa anema ken o aika benokyonga ken o ka nung danga pa aija mali, ta ashi.

Singhvi-isa, iba kin (Modi kin) ya kin tilaka dang, aser pai (Rahul) jembiba oji ajanga jashirtemji BJP office nung inyakerkem dang, ta ashi.

Singhvi-isa, "Iba aibelen ya loktiliba anema masü, nisung apuba, tashiyim amshisa taküm raksatsüba mesüra nisung tepsetba aibelen ka masü. Democracy linük nung melung masürtem lir aser tangatetba balala lir. Gandhi ya ozüing alema inyaker nisung kanga tamajunger ka masü. BJP nung inyakertemi pa anema ken o aika benokogo saka kodanga maitsü. Gandhi-i Parliament mongpu balala senden ana nung medentet," ta metetdakja Gandhi-i tekaraba nung Parliamentary mapa inyaktettsü aser election nung tokteptettsü atema mepishia liasü.

Nuh nung raraba ken o nung nisung 23 court matsüngdangi anir ao

Nuh (Haryana), August 04 (Agencies): Tawa Haryana kübok Nuh nung tamangba lokti ana tsüingda rara adokba ken o dak sendakba nung nisung 23 pua lir; parnok ajak court matsüngdangi anir aoba sülen anogo pongunü atema police ket nung agütsüogo.

"Ken o balala nung tai tonglokja alir nisung 23 tanü court matsüngdangi anir ao. FIR No. 261 nung tai tonglokja alirtemji anogo pezünü atema agütsüogo. Tai tonglokja alir ka anogo asemnü, nisung pongu pezünü aser tanüingba nisungtemji anogo pongunü atema police ket nung agütsüogo," ta Counsel-i metetdaksü.

Brihostibarnü Haryana

Home Minister, Anil Vij-i, Nuh aser Gurugram districts nung rara adokba dak sendakba nung police-i FIR 83 benok aser nisung 159 pua liasü, ta metetdaksü.

Taoba mapang Haryana chief minister, Bhupinder Singh Hooda-ibo iba tatalokba ya sorkari menokdangtet, ta aija high court judge ka leniba nung judicial ajanga bushisüngdangtsü takhangba agüja liasü.

Osangbenertem den jembidang Hooda-i, "Sorkari Nuh nung rara menokdangtetba ya high court judge ka leniba nung judicial-i bushisüngdangtsü onoki akhanger, kechiyong ibaji ajanga dang iba tatalokba indang ochi jungkai adoktsü," ta metetdakja liasü.



August 04, 2023 nü New Delhi nung Kerala Chief Minister Pinarayi Vijayan-i Union Minister for Transport & Highways, Nitin Gadkari ajurudang tangokba noksa nung angur.

Election nung tokteptsüpur arrshi küm telatet ajemtsü benok

New Delhi, Luroi/August 04 (Agencies): Hokolbarnü Parliamentary Committee kati Lok Sabha aser assembly elections nung tokteptsü atema candidates arrshi küm telatet ajemtsü benokogo. Lok Sabha aser state assembly elections nung tokteptsü janrar candidate kaji tajemtiba agi arrshi küm 25 bosa asütsüla; yamaji Rajya Sabha aser state legislative council nunga züngsem atema tajemtiba agi arrshi küm 30 asütsüla.

Ajisüaka Parliamentary committee-i, lanurtem nem kasa maongka agütsütsü aser democracy nung shilem agidaksütsü atema arrshi küm telatet ano ajemtsüla, ta benok.

BJP MP, Sushil Modi-i aniba Parliamentary Committee-i Canada, United Kingdom aser Australia ama linüktem nungbo national elections nung tokteptsü atema arrshi küm teküboktibaji küm 18 lir, ta metetdaksüba den külemi lanurtem temsüa lir aser parnoki yimtenren nung shilem tajung agitettsü, ta metetdaksü.

Parliamentary committee-isa state assembly elections nunga candidates atema arrshi küm telatet ajemtsüla, ibaji ajanga lanurtem nem tashi agütsütsü aser democratic inyakyim nung shilem agitettsü, ta metetdaksü.

Ajisüaka Election Commission-ibo, arrshi küm 18 lanurtem dak nüngdakba 'experience' malitsü aser Parliament o state assemblies nung khuret abentsüsa ano tain masü, ta bilemer.

Parliamentary Committee-i, "Election Commission-i Parliament, state legislature aser local bodies election nung tokteptsü aser vote agütsütsü atema arrshi küm 18 tashi ajemtsü atema shisadangdar, saka parnoki arrshi küm 18 lanurtem dak khuret abentsüsa 'experience' mali aser ano tain masü ta bilemer. Commission-i Parliament aser state legislatures nung züngsem akümtsüpurtem arrshi majemtsüner aser parnok dak iba tangatetbaji lir," ta metetdaksü.

Iba dak sendakba nung committee-i Election Commission aser sorkar naprongla dang lanurtem nem yimtenren nung shilem agidaksütsü atema civic education programs katsüttsüla, ta ashi.

GOVERNMENT OF NAGALAND
DIRECTORATE OF HEALTH & FAMILY WELFARE
 NAGALAND : KOHIMA

NO.DHFW-21/FSSA/Workplan(MoU)/HR(FSW)/28/2022-23/2024 Dated Kohima the3rdAug'2023

ADVERTISEMENT

WALK-IN-INTERVIEW

| S.No | Name of the post | No of Post | Posting Place | Educational Qualification | Consolidated pay per Month | Date and Time of Interview. |
|------|------------------|------------|---|---|----------------------------|-----------------------------|
| 1. | Food Technician | 6 | 2 - Kohima 2 - Dimapur 2 - Mokokchung | Minimum qualification of B.Sc. in Chemistry, Biochemistry, Food Technology or Microbiology, Food & Nutrition. | ₹ 20,000/- | 10/8/2023 11:00 A.M |

A walk In Interview for filling up the following posts under the Commissionerate of Food Safety, Nagaland will be held in the Directorate of Health & Family Welfare on the **10th August from 11:00 AM** for operationalization and functioning of the Food Safety on Wheels (FSWs) to carry out Surveillance, Awareness, and Training. The post will be under the Nagaland Food Safety Project and are purely on contractual basis initially for a period of three(3) months. Intending indigenous candidates having requisite qualifications may report to the Selection Committee on the date as below along with relevant academic original documents from HSLC onwards, ST and Indigenous Certificate, Employment Exchange Card, 2 (Two) numbers of recent passport photographs and a set of self-attested copies of certificates and testimonials.

Reporting time: 10:00AM Venue: IDSP Conference Hall, DHFW, Kohima

* Note: No TA/DA is admissible for attending the interview
 * Age relaxation will be given as per Govt. norms.

Sd/-
(DR. VIBETUONUO M. SACHU)
 Principal Director & Addl. Food Safety Commissioner
 Directorate of Health & Family Welfare
 Nagaland : Kohima



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 05, 2023

Foothill Road atema ola adoktsüla

- P Tiamongba Aier

Alima nung gari lenmangtem rongnung tia makatibaji Foothill Road ya asütsü kechiyong iba lenmang yanglutsü sentong atongba sülen joko küm 50 jungdi ta asür saka tanü tashi lenmang ano meyangluzük lir. 1974 küm Nagaland sorkari kilometre 300 tema "Foothill Road" ya yanglutsü asadanga liasü aser Nagaland Foothill Road Co-ordination Committee (NFHRCC)-i 2013 küm nungi iba mapa asentenshia tenzük. Tangbo iba lenmang dang "Trans-Nagaland Expressway" ta ajatsü lemtetogo saka "People's Road" ta ajaba ya kanga shitak lir kechiyong iba lenmang ajanga Nagaland nung district 7 sendakteper aser Naga kin 12 tema tajangzük angutsü. Talisa nübortem senzusenbong zübaba dang masü saka iba lenmang ajanga rongsenketzung tsütsüa terenlok jenti angutsü. Naga kin hoho 12 nungi teshimtet nübotem shimteta tentetba NFHRCC-i 2013 nungi kanga dang meranga iba lenmang anepalua yangluyonga arudar saka senotsü tsütsü tetsükdaktsü ajuruba ajanga tanü tashi lenmang meyangluzüker. NFHRCC-i iba lenmang yanglutsü asentenshia tenzükba sülen joko küm 10 ajunger saka lenmang lapoktsü osang kecha mangazüker aser idang ya kechiba iba lenmang yanglutsü küm paikaya agir ta tasüngdangba ka arur. NFHRCC-i anir kin hoho balalai Nagaland state sorkar dang aiben iba lenmang nung temulung agütsütsü, nübortem Assam ajanga senzüba asoshi süoki ia bilemstü aser nungdakba senotsü agüja tekaratiba nung iba lenmang yanglutsü mepishia arur saka tanü tashi mapa metembangteter. Iba lenmang yanglu tenzük Financial Year aika süia aruogo saka state sorkari budget nung Foothill Road atema tenük sünga senotsü lemezüksüba mengudang. Küm aika lia arur September 22, 2022 nü Nagaland Legislative Assembly-i Foothills Road atema bangzung ka agia liasü saka ibaji mapa küma meinyakba ajiteta NFHRCC-i July 28, 2023 nü state sorkar dang Financial Year 2023-2024 nung iba mapatong ya North East Council (NEC) ajanga inyakdaktsütsü nenshiogo. Anungji state sorkari iba temepishiba agizüka tekaratiba nung NEC ajanga iba mapatong inyakdakja tembangtsü imlar. Ajisüaka state sorkari tan-a Foothill Road atema süoki ia mebilemi senzüka yutsüra NFHRCC aser kin hohotem ketdangpurtem pusema iba lenmang adena süiba kin ajaki ola adoktsüla ta bilemer. Kechiba Nagaland sorkari iba lenmang atema temulung magütsür? State yimtiba Kohima madenba agi temulung magütsür asü? Assam nungeri iba lenmang meyangludaktsütsü atema süpokrem sen agüja rongshiba agi temulung magütsür asü? ta nübortemi state sorkar dang asüngdanga rongshitsü mapang tongja tongogo. Asenoki Nagaland state sorkar inyaksangshi reprangdangra tesüiba kümtem aser taküm-a nungdak balaka maliba mapatongtem mesüra kin ka-ana dang ajangzüksüba mapatongtem atemabo sen crore sa crore lemezüksüba angur. Süra Naga kin 12 atema kanga dang tongtipang lenmang atemabo state sorkari kechiba sen agütsütsü koror mesüra senotsü lenmang mebushir? Iba nung asenok tebilemdangtsü tulu ka lir ama ajiteter aser nungdakra lungkak aita nungdakba senotsü meshia iba lenmang ya yanglutsüla. Nübor taginüba mesüra nungdakba meshia timi lungkak aittsü ozüngi melar anungji state sorkari maneni iba lenmang senzüka yutsüra Young Naga Action Committee on Foothill Road (YNACFR)-i anir nübortemi sorkar rongshitsü mapang tongogo.

OLEMSABANG

Par aka, asen maka...!

Lipoksongkum Imsong

(Yashi adok nungi...)

10. **Helipad** yaa Assam Rifles indang amshir mesüra par i mekazüka yua kar; *law & order* tensa kar adoker yaa *civilian* nem melapoktsüra koda?Pi bo Dimapur *Airport* sülen Kohima Chiethu *greenfield airport* tenzüka inyaka aotsü15 July 2021 tashi nung *Ministry of Defence* "no-objection certificate" (NOC) agütsüogo. Hau ni Kohima ji *capital* ji tu tanga *district* dang nungi tera bo balaka süküm saka par bo *helipad* AR indang ka den, Lerie nung a ka, *VVIP & emergency* atema bo *Civil Secretariat Ground* nunga helipad lir; meilongi bo Chiethu *Airport* ji amenoktsü ta otsü odar. Asenok ji basa sa chiyungtsü.
11. Hau **Town Hall** ka lir saka tang tashi nung bo *state of the art multicultural complex* ka bo alitsüla tu? Oda ano Kohima nung sa reprangra *State Academy Hall* tajung lir, iba den *RCEMPAJotsoma* nung kanga tajung lir, ano *Smart City* sen teyari ajanga *Capital Cultural Hall international standards* nung renemteta yanglua lir. Ano *Capital Convention Centre* lir. Maka aliba nung ojang temulung südi arung. Tawa *papertem* nung *tribal hall* aser *hostel* yangluba bo asenoki nguogo aser kar bo Mokokchung *district* nunga liasü. Ni bo ka dang ngua maka. Ni anguba ji tongtibang masü, sakatetezü ji item ya yanglutsüsa ji *Ministry Department* balala nungi *scheme* bo lir. Saka kin aser lokti temulung magütsü; iba den *contractor, department* aser *MLA*ba 'milateper' sen bo agizüka agidar ta tatsü agi shidi.
12. **Parking** maka *town* telongtet nung. Meshiaka mangur nung asenoki memeshira koda akatsü? Kohima nung bo *Old NST* nung ka, PHQ kübok *Old Medical Directorate* nung ka ta renemtetogo aser *Old Assembly Area* nung *city centre / Parkingpropose* süa lir aser ibajia ita trok tashi nung renemtsü ta osang lir . Par bo *smart city* agi inyakba süla ba saka asen lima *Smart City* meliaka asen kin-i *smart* süa meshizüksüla. *Department* sen maka *sanction* maka dang shipet ashitsü aser itasen dena magütsüi lungkak aitdakja toktsütsü saka par bo ki yanglutsü, *hotel* lapoktsü, *resort* yanglutsü, *contract* ajak inyaktsü atema bo sen ji jatetdaktzöpokdak ka lir amai ja!!!Pi bo *capital* den *smart city* amenlok ji tu *capital benefits* den *smart city infrastructure* ajak agidar. Lar aser par dang bulongtsü asen bo metsü alua sa reprangdijai.
13. **Districts aika mepuzüka** yokba ya koda?Dimapur tu par litsüi belener tunüba metutetba yong par atema ka kazük iba mapa ji atemtsü atema memeshir kar nem dena agütsü. Yakta nungi meshirtem tang tashi mangur. Hau ni Dimapur Kohima Chümoukedima nung asen Aor aika lir ko, kanga junger saka asen tasoli bo Mokokchung *district* a süngtu. Repranga liang Chümoukedima ya Dimapur dang nungia tajungba kümdar aser ano akümstü ta kuli aika alitsü saka asenokikar yamai angur...
 - a. NIT kong? Chümou
 - b. Agri expo koda? Chümou
 - c. Police complex? Chümou
 - d. ICFAI, Referral CISHR, St. Joseph University, ajak Chümou
 - e. Joko Patkai a Chümou nung atener
 - f. ICAR NationalMithun Research Jharnapani, ajia Chümoukedima district
 - g. SASRD? Ajia Chümou district
 - h. Cricket stadium koda? Sovima yimdak lir ji, Chümoukedima district
 - i. Dhansiri – Zübza Railway line jia par lushu lika lim nung sa atutsüa aji.

Kohima nungi Tseminyu salazüka yok nung parnok bo ano Chümoukedima angu ati.Chümoukedima jagi *capital* ji *officially* bo belener meluaka *capital infrastructure* ajak amenokdar mesüra*commercial capital* akümer. Dimapur nung kechi toktsü anati temetet dang. Dimapur ji *commercial capital* ta sa ja aruba tu bendanger tzümar tem *capital* akümstü ana nung dang lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arunachal B/C Council nungi lanurtem leadership training agi



Dimapur, August 04 (TYO): Mission (IOM) aser Arunachal Baptist Church Council senteper ayongzük aser iba sentong nung Delhi, Guwahati aser Nagaland nungi shisalen sayurtem densema nisung 50 dak temai shilem agia aden.

Tongti shilem agirtem rongnung Rev Tugaso Manyu, General Secretary ABCC, Ongtang Simai, Youth Secretary, Dr Imkongmeren, Delhi, Emanuel Tanti State coordinator IOM, Guwahati, Imli Lemtur, Jorhat, Chubawabang, Dr Rabi Pame

asert Rev Takatemjen nungertem lisü.

Iba training program nung tebilemstü onük tongti rongnung kaji- India aser Northeast nung Arogo reshikangshiba tensa liasü. Iba dak alia tang onükteji Laishiba nung tatishitsü tajung aliba nisungtem, lanurtem tebilemstü onük balala bentetba aser Khristan lenisüba shisadangshiba liasü.

Iba sentong tembanga shilem agir ajak nem certificates agütsü.

Iba training program nung tebilemstü onük tongti rongnung kaji- India aser Northeast nung Arogo reshikangshiba tensa liasü. Iba dak alia tang onükteji Laishiba nung tatishitsü tajung aliba nisungtem, lanurtem tebilemstü onük balala bentetba aser Khristan lenisüba shisadangshiba liasü.

Iba sentong tembanga shilem agir ajak nem certificates agütsü.

ANOGO ABEN TSÜNGREM DEN

Sempettem Rom 8: 28-39

Kechiyong tesüiba süshia, taküm süshia, kotak tenyartem süshia, yimsüsürtem süshia, tang alibatem süshia, tarutsü alibatem süshia, ain aketbatem süshia, tema nung aliba süshia, telung nung aliba süshia, tangar teyangluba oset süshia, asen Kibuba Khrista Yisu dak aliba Tsüngrem temeim nungi asenok piladaktsütsü makoktsü ta ni chichia amanger. Rom 8: 38-39.

Oh! Koda tejangja. Kechaia Tsüngrem temeim asenok nungi bener aotsü makok.

Asenok meketa tashi aikati asenok nungi aji bener aotsü meranger. Kaji asenoki pei sasa meimba. Asenoki Tsüngrem temeim dang nungi asen taküm, temang, asen mapa, asen temeten mesüra asen rongsen taoba züngshir. Asenoki kotak ajangzüktsü merangba dang nungi alima nükjitongang arishir.

Asen meketa Tsüngrem temeim den toktepba tashiji alima lir. Asenoki sen tali penputsü alimai atitanger, tangari tali metetta kümdaktsüner aser konang tali aginüba agi asenok atitanger. Aser Khrista nung Tsüngrem temeim asen meketa aliba den aritepdang tebilemdangba makar.

Satani item Tsüngrem matenba tashiji koda meimer! Pai akoktsüba lemanng ajak aser temeten bushitsü aser temulung süa alitsü shisatsü agütsütsü mapang tajung teti bushir. Alimai inyakba ama inyaktsü teti ajungshir.

Saka aji tokjang. Tsüngremi ne taküm asoshi atsütepba nung dang ne den atener masü saka na asoshi rarar. Tatok agütsüba Pa temeimi ne taküm piyong, teti taküm tashi, na yaritsü. Pa dak aser Pa O nung amangang.

Ne tenüng asanger, Tsüngrem Yisu tenüng nung onok den teti dena liang. Amen.

Chhattisgarh state nung lokti kati Khristan pezü dak azük

August 04, 2023: Chhattisgarh state nung Hindu nungertem telok kati Khristan pezü dak azük, ta International Christian Concern (ICC)-i metetdaksü.

Yimdak yimsüsürtem lia Hindu yimsü alia amangertem jagi Khristan pezü dakji azük.

Osang angazükba agi, yimdak yimsüsürtemi Khristantemji senden kati jaoka liasü, iba sülen Khristantem dang Khristan yimsü toktsür Hindu yimsü tanaben agizükang, ta ashi.

Yimsüsürtem jagisa Khristantem dang o tamajung shia amokmeren aser lokti-ia nenoki Khristan yimsü

metoktsüra majungtsü, ta amokmeren.

Yimsüsürtem jagi, nenoki Khristan yimsü metoktsüra yimdak nungi meindoktsü ta ashi, ajisüaka Khristantem jagi parnoki Khrista metoktsütsü, ta langzü.

Idangyongjisa lokti jagi süng amshia par pezü dak kanga mejungi azükba sülen hospital-i anir ao.

Iba tatalokba dak sendakba nung nisung 8 anema ken o benokogo aser police-i iba tatalokba bushisüngdang tenzükogo.

Iba osangji angashia yimdak tanüngba Khristantemjia tetsübu nung

yim totsür jena oa anasa aliba yimsüngtem nung jenokogo.

Tang India nung state 11 nung anti conversion ozüngtem benoka lir aser item states rongnung Chhattisgarh densema lir.

Hindu yimsü alia amangertemi iba ozüng nungi maongka agia Khristantem aser Muslim nungertem anema inyaker.

India nung anti-conversion ozüng ya mezüng 1967 küm benoka liasü; iba sülen iba ozüng kübok nisung aika nem tai tonglokkaja ken o benokogo, ajisüaka iba ozüng kübok aitsüba ken obo ishika dang lir.

Texas nungi missionary telok ka Niger nungi kümzükogo



August 04, 2023: Lufkin, Texas nung aliba Harmony Hill Baptist Arogo nungi missionary telok ka Niger linük nungi aniteta kümzükogo; taoba hopta Niger linük nung sepaitemi Tir, Mohamed Bazoum atsüngdokba sülen iba linük nungji tensa raksaago. Brihostibarnep Arogoi

Facebook post ka ajanga, "Parnok tayimtsü ajanga America-i aruogo! Parnok atema maneni sarasademjang," ta lemsatop.

Arogo youth ministry nungi missionary temji Niger yimtiba, Niamey-i mission mapa atema oa liasü, ajisüaka July 26 nungi sepaitemi Niger Tir, Bazoum

anema apusoba sülen tensa raksaba ajanga missionary temji meyipa maruteti liasü.

Harmony Group nungi missionary tem jagi Facebook post ka ajanga, parnok Amongnü (July 30) US-i meyipa aotsü tebilemba liasü, ajisüaka Africa nung aliba linük nung sepaitemi democracy ajanga shimtetba lenir anema apusoba ajanga parnok sentong matalok aser meyipa maruteti liasü, ta metetdaksü.

"Niger nung tenzükba wadang inyaker Student Team atema sarasademtsüba atema nenok ajak dang pelar. Anogo pezü tashi parnoki ministry mapa inyakogo! Ozü team Amongnü (July 30) meyipa arutsü tebilemba liasü. Ajisüaka sepaitemi sorkar atsüngdokba ajanga airport shibang, aser ibajia ajanga team züngsemtem meyipa marutet," ta ministry-i metetdaksü.

Arogo nung pastor, Charles Roberds-i sangdong ka ajanga, missionary team nung züngsem 12 prongla Rome-i osetba atema Arogo züngsemtem pelar. Iba atema U.S. Department of State aser Niamey nung aliba U.S. Embassy danga pelar. Tang parnok Italy nungi kidangi meyipa arudar," ta metetdakja liasü.

Pastor-isa, "Tamangertemi sarasademba Kibubai langzüogo, kechiyong Kibubai missionary tem kümzükoga tang parnok Italy nungi apusooogo. Arogo züngsemtem aser mezüngdangtetba nüburtemi nungita sarasademtsüba ajanga parnok kümzükogo," ta metetdakja liasü.

Pastor-isa Lufkin nung Mayor Mark Hicks, U.S. Rep. Pete Sessions aser Senator Ted Cruz nungertem danga pelaba lemsatop.

Roberds-i Arogo tenüng nung Italy nungertem dang pelaba lemsatop.

"Arogoi Italy nung lenirtem dang pelar, kechiyong parnoki missionary tem anepalua tayimtsü ajanga kidangi yoker," ta pastor-i metetdaksü.

U.S. Department of State-i Bodhbarnü (August 2) Level 4 Travel Advisory sangdonga America nungertem dang Niger linüki maotsü tekümdangtsü metetdakja liasü.

"Missionary temji parnok kibongtem dangi meyipa shilangba mapang nung Harmony Hill Baptist Arogoi ajak dang maneni parnok atema aser Niger nungertem atema sarasademjang ta mepishir. Arogoisa Niger nung aliba America nungertem aniteta anir arutsüa atema sarasademjang," ta pastor-isa mepishia metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rongdentsü

(n) kidang shi ango rezünga ayuba (reserved meat and fish at home)
* Ajungben nüngdak atema kidang teti rongdentsü ayur.

Rongitsü

(n) rong aniba oset (oar)
* Rongitsü ana agi ayong tulu nung rong anir aoer.

OLONG PAITEP # 6597

| | | | | | | | | | | | | |
|----|--|----|----|----|--|--|----|---|--|----|----|----|
| 1 | | | | 2 | | | | 3 | | | | 4 |
| | | | | | | | 5 | | | | | |
| 6 | | 7 | | | | | | | | | | |
| | | | 8 | | | | 9 | | | 10 | | |
| 11 | | | | | | | | | | | | |
| | | | | | | | | | | | | |
| | | 12 | | | | | | | | | | 14 |
| | | | | | | | | | | | 15 | |
| 16 | | | 17 | 18 | | | | | | | | |
| | | | | | | | | | | | | 19 |
| 20 | | | | | | | | | | | | |
| | | | | | | | | | | | | |
| | | | | | | | 21 | | | | | |

TIPIEN

- 1. Temeyoktep mali - (6)
- 5. Len tom nung anenzükdak - (5)
- 6. A ___ ep - (3)
- 8. Tzü nung asü - (7)
- 11. Nashi chiyungtsü - (3)
- 12. T ___ k - (3)
- 13. Jang asepa oset - (3)
- 15. Nütsü tebuba - (3)
- 17. Longkümer tetsür dang ajaba - (7)
- 19. Terok nungi adokba - (3)
- 20. Tamajung aküm - (5)
- 21. Süoshi kecha magi - (6)

LANGTSÜNGLEN

- 2. Tajatsü yim - (8)
- 3. Te ___ pba - (4)
- 4. Temang nung asepa - (4)
- 6. Ishika - (4)
- 7. Mezüng - (6)
- 9. Soa lia aoba - (8)
- 10. Atsük tila - (6)
- 14. Arentak - (4)
- 16. Ajak dak atongba - (4)
- 18. Kümtekdakba - (4)

OLONG PAITEP # 6596 TELANGZÜBA

TIPIEN:

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN:

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA



July 2, 2008 nü National Geographic Society headquarters, Washington, DC nung tsüngsem (sneakers) jura 10,512 bendener sendaktepa aliba noksa nung angur. I dagi tsüngsem jura ana alakteta juteta adoka alibaji movie actress, Cameron Diaz indang tsüngsem tejen lir. I tem ajakji ka-khen, ka-khen ta atongtepa aoba nung feet 8,700 (miles 1.65) shi liasü aser ibaji tsüngsem talangtiba atongtepa ayuba nung Guinness World Records angu. Kanga dang tesüngmangtsü kaji, iba alizüng tongtetba sülen item tsüngsemji tanaben tanga nung amshitsü atema (recycle) Nike indang 'Reuse-a-Shoe program' bushia bener ao. I temji basketball court aser tanga asayadak alemtsü atema yanglu.

Tripura: Food dept-i ozüng alema shishilembartem potet

Agartala, Luroi/August 4 (Agencies): Tripura food and civil supply minister Sushanta Chowdhury-i ashiba agi, par department-i ozüng alema inyaksangshiba (black market) aser osettsüt meyoki bendena ayuba atema senchi sen lakh 3 dak tema chiogo aser iba den ration dokan pongu indang license thitsü aser dokan 10 shibangtsüogo.

Food minister-isa, food department-i, taoba ita asem tashi state nung shishilembadak balala aser fair-price dokantem nung ozüng alema ochi mashi inyakyim benoka inyakba nokdangtsü atema meita odar, ta ashi

"Tang tashi nung shishilembadak 184 meitaogo. Meita aoba sülen senchi sen lakh 2.26 chiogo aser shishilembar 58 nem show cause notices agütsüogo aser dokan 10 khen atema shibangja lir," ta pai ashi.

Minister-isa, fair-price dokana 1,789 meitaogo, ta metetdaksü.

"Fair price dokantem rongnung 277 nem show cause notices agütsüogo. Fair price dokan 5 indang license thitsüogo aser senchi sen lakh 1.4 chiogo. Tasa tamajung yanglua masüba ka nung anüngaponga sayuba mesüra ozüng alema shishilembada

(black market) sashi sashia aziüktsü. State nung jang, shini, wheat, petrol, diesel amala anogoshi nüngdaktem peria lir," ta pai ashi.

Maneni food minister-i ashiba agi, jangotsütem state kübok fair-price dokan aser Anganwadi centre 2,056 nem agütsütsü.

Paisa, tang nungi APL consumers temi lentils seret nung sen 84 agi masü saka 82 agi alidaksütsü aser BPL aser Antyodaya consumer tem fair price dokantem nungi lentils seret nung sen 59 agi masü saka 57 agi alidaksütsü atema sorkari telemtetba agiogo, ta ashi.

Mizoram: Congress tir-i BJP anema longjemtsü ayongzük



Aizawl, Luroi/August 4 (Agencies): Mizoram Congress tir Lalsawta-i, political party ajak, NGO tem aser Arogotem dang longjemer BJP anema nokdaksü ayongzükogo.

Pai, BJP inyakyim balala ajanga linük aser Mizoram tang kang dang tamang tia ka ajangshia aoba mapang lir, ta ashi.

"Nüjiso anguba sülen tang tashi nung tanü ama linük tamang tia ka aser tensa tamajung ajangshidanga mali. Iba ya lokti nung nütsünyongsük agi ajema aliba nüburtem tamangba yimsü aser sobaliba samatsütsü atema BJP-i policy balala benoka inyakba ajanga lir," ta Mizoram Congress tekolakba Lalsawta-i ashi.

Paisa, BJP-i, religious minorities tem sobaliba, libaliro aser tamangba yimsü dak

sendakba nung nüjiso samatsütsü asoshi inyakyim tenzükogo, ta ashi.

Lalsawta-i, alima nung Khrista dak amangertem asoshi talitsü tamajungtiba linüktem rongnung India-a densema lir, ta ashi.

Mizoram Congress tir-i ashiba agi, Manipur nung kin o kin na mangatettep adokba ya BJP inyakyim ajanga lir.

Maneni pai, BJP-i uniform civil code (UCC) benoktsü jenjang agiba aitsüogo, koba pai ashiba agi, lokti nung nütsünyongsük agi ajema alirtem sobaliba aser libaliro samatsütsü asoshi merangdangba ka lir.

Pai, Forest Conservation (Amendment) Bill Lok Sabha nung July ita agizük aser upper house nung Mongolbarnü agizükogo aser iba ajanga tzu mopung dak kongshitsü, ta ashi.

Linük tia apir Indian National

Developmental Inclusive Alliance (INDIA) ya opposition party temi (non-BJP) BJP anema nokdaksü atema tentetba lir, ta Lalsawta-i ashi.

Pai ashiba agi, BJP indang policy yagi linük telongjem raksatsütsü.

"Tang tensa aser BJP kanga kara renlokyonga aoba reprangdangra longjemer nokdaksü nüngdaka kümogo. Ni political party ajak dang longjemer iba yipru anema raratsü mepeshir. Maneni ni NGO aser Arogo ajak dang longjemer iba anema raratsü ayongzük," ta pai ashi.

Kasa mapang nung Mizoram Congress tir-i, par party taruba assembly election nung menden 40 prongla nungi tokteptsü, koba taküm küm tatemlen agitsü lir, ta ashi.

Paisa, parnoki August ita candidate tem tembanga shimtsü, ta ashi.

Manipur: Kwata nung nisung ana yiru

Imphal, Luroi/August 4 (Agencies): Hokolbar anepdang Manipur, Bishnupur district kübok Kwata tesem nung mejangjaba nisungtemi injang khaloktsüba sülen tanur ka densema nisung ana yiruogo.

Lendong nung yirur alir ana ya Md Sabir Ahmed Moijingmayum (11) aser Wahida Aribam (35) ta jangjaogo.

Tenaprongla ya Bishnupur district kübok Kwakta yimtsü nung alir.

Hokolbar anepdang

mejangjaba nisungtemi parnok kidang injang khaloktsüba sülen tena ya injang agi yirua liasü.

Iba tatalokba sülen tenaprongla Kwata primary health centre (PHC)-i anir ao aser idak nungjiagi Imphal nung Raj Medicity-i anir oa liasü.

Kasa mapang nung, khatepba lendong nung yiruba 6th Manipur Rifles nungi sepai ka Hokolbar anepdang süogo, ta official source kati metetdaksü.

Tourangbam Rishikumar (47), shiba Imphal West district

nung Senjam Chirang water supply plant anasa yoker liasü, pa mejangjaba nisungtemi injang khaloktsüba mapang tekolak aser tenarong yirua liasü.

Pa ya Brehostibar (August 3) anepdang yimdaklirtem tekümzüka tesem kati anintsü merangba mapang yirua liasü.

Hokolbarnü asür den tepila sentong Manipur home department-i ayongzuka Thoubal district kübok pa aliba Wangjing Landing Mamang Leikai jila nung agiogo.

OFFICE OF THE CITIZEN CLUB LONGSA MOKOKCHUNG, NAGALAND-798601 Khonang tetushi Agutsür



- 1. Kr, Lipoksangla... 2. Sp. Toshimongba... 3. Sp. Moyajungshi... 4. Kr. Lipokienla Jamir...

Sd/- Bendangnukshi Jamir President, CCL

Sd/- Limabenla Jamirtsur Secretary, CCL

PELABA LEMSATEPER



ASO 27-06-1948

ASÜ 25-07-2023

Onok, asür Rongsennungla kinungertemi onok mulung zürep khuret mapang nenoki lenmang palala ajanga onok yariba atema kiyongertem, kija kibongtem, arogotem, telongjem palala aser lokti tentet palala dang onoki temulungjang taroktiba nungi pelaba lemsateper.

Tsüngremi nenok masadangtetba temeim yimlibilem mapatem asoshi nenok ajak moajangma.

Temeim Kinungbo, Chirnurtem, Semchisemnurtem aser Kinungertem.

ISIL-i par lenir Abu Hussein al-Qurashi asüba sangdongogo



Luroi/August 04, 2023

(Agencies): ISIL (ISIS) teloki par lenir Abu Hussein al-Husseini al-Qurashi asüba jangjatsüogogo aser pa melena Abu Hafis al-Hashimi al-Qurashi shim.

Iba telok yagi Brehostibarnü ashiba agi, par lenir ya tsükchir kübok aliba northwestern Syria nung Idlib province nung Hayat Tahrir al-Sham telok den raradang tepset.

Iba osang ya ISIL odongtari Telegram messaging app nung record asüba message ka ajanga ashi saka pa kodang tepsetar ajibo mashi.

Turkish intelligence forces ajanga ISIL lenir ya Syria nung tepsetogogo, ta Turkey Tir Recep Tayyip Erdogan-i April ita shia liasü.

"Daesh indang lenir südi ta temolung melempi alisang codename Abu Hussein al-Qurashi ya Syria nung MIT [National Intelligence Organisation] ajanga operation ka agidang tepset," ta iba mapang Erdogan-i Arabic nung ISIL dang ajaba tenüing amshia shia liasü.

Turkish media ajanga noksa balala prokshiba nung Syria indang Afrin region nung alu tiyong nung ki ka raksar aliba angu, aser yangji pa atsüka liasü, ta ashi.

Afrin ya Aleppo province nung lir - koba Idlib anasa - aser ibai Turkey-i yariba telungpur teloki amokbanga lir.

Ajisüaka Brehostibarnü ISIL odongtari ashiba agi, Idlib province tesem kar amokbanga aliba Hayat Tahrir al-Sham teloki par telok tekolakba tepset aser tasü mang ya Turkey nem agütsü.

HTS ya Ankara tejangraba nung inyaker, ta ISIL-i aitsür saka parnoki ISIL lenir dak tenük yoker operation agiba shia mali.

United States aser danga Western sorkari HTS ya kiralongrar telok ama züngshir.

Turkey indang Anadolu state news agency ajanga iba mapang ashiba agi, MIT ajanga operation ghonda pezü agia ISIL lenir aliba jangjatet.

ISIL leniri pa aputsü ta meteta pa dak inoka aliba suicide vest pokdaksü aser iba mapang Turkish operative kata masü mesüra meyiru, ta Anadolu-i ashi.

ISIL ya 2014 küm Iraq aser Syria nung tashi ulushia akum aser iba mapang linük ana nungya alinük aika makdok aser 'caliphate' sangdonga liasü.

Parnoki yimsü asüba mapang nisung tekolak tangzüka yok aser nisung telok-telok khaseta liasü.

Iraq nung parnok madak 2017 küm takok angu aser küm ana lir Syria nunga makdok, saka par züngsemtemi linük anaprong nung maneni lendong agütsür.

Abu Hafis al-Hashimi al-Qurashi ya iba telok tenteter lenir pongu buba alitsü.

Taoba küm November ita ISIL ajanga par taoba lenir Abu Hasan al-Hashimi al-Qurashi tepsetogogo, ta shia liasü.

Pa melensang Abu Ibrahim al-Qurashi ya taoba küm February ita United States-i Idlib province nung tepset.

Iba telok indang lenir mezüngbuba Abu Bakr al-Baghdadi ya Idlib nungsa October 2019 nung tepseta liasü.

August 9 nü Pakistan indang National Assembly shibangtsü

Islamabad, Luroi/August 04 (Agencies): Pakistan indang National Assembly küm pongu kümsük tembangtsü anogo asem lia shibangtsü, ta Ato Kilonser Shehbaz Sharif-i ashi.

Brehostibarnü par coalition züngsemtem asoshi chiyongba sentong ka ayongzükbang nung Sharif-i iba osang ya sangoktsü, ta iba senden nung adener senior government minister kati pa tenüing memetdaksü ashi.

Taoba küm April ita Parliament nung no-confidence vote ajanga Imran Khan atsüngdokba sülen Sharif ya ato kilonser inyaka arur.

National Assembly shibangba ajanga küm tatemlen general elections agitsü sapang lapoktsür.

Pakistan indang constitution nung assembly ya mapang shidak nung shibangra, koba August 12 lir, elections ya anogo 60 tsüngta agitsü, ta shia lir.

Ajisüaka anogo ka agi danga jelia shibangra election agitsü asoshi mapang ya anogo 90 tashi atsülangtsü.

Sharif-i sangdongba ama assembly ya August 9 nü shibangra, elections ya caretaker government ka ketdangsüba kübok November ita agitsü, koba constitution nung mela lir.

Caretaker prime minister aser danga ketdangsürtem hopta tatemlen sangdongtsü amai lir.

Brehostibarnü chiyongba sülen television ajanga jembidang, yimten tashi tsütsü par teloktep sorkari tayongzükbang jenti ajangshir, ta Sharif-i ashi.

"Onok molungsentsü temürek lir. Onoki onok politics bendanga agütsür asen linük yipru nungi anitet," ta pai ashi.

Saka Sharif'er sorkari Khan dak tenük yoker ta tai tonglokja arur, koba yimtenren tsütsü pa den tokteper tongtipa lir, aser kechiaser Khan anema ken o aika benoka lir aser par Pakistan Tahreek-e-Insaf (PTI) party ketdangsürtem pua merenshir.

Item ken o ya taruba elections nung pa shilem agiba nungi nokdangtsü mechi lir, ta

Khan-i ashi, kong PTI ya party tulutiba ama adoktsü amai lir. Taoba küm November ita political rally nung Khan ya tepsettsü merang saka pa takum jenbu.

May ita Khan mapang tatsüka atema apuba mechi PTI workers aser par bukumer temi sorkar aser mitkar aliba tesemtem amakba mechi nisung meyirijang aika pua lir.

Pua alirtem ya aika mitkar ozüing kübok obendang agütsütsü lir, koba rights groups temi aitsür.

Pakistan nung ano azüdokshi tali akumba mapang ka lir, aser July ita kisung nung Tehreek-e-Taliban Pakistan (TTP) telungpur teloki lendong 90 dak tema agüja liasü.

TTP ya tangatetba tsütsü kidanger linük, Afghanistan nung yimsü asüba Taliban den mesüktepa lir.

Kasa mapang Pakistan indang rongsenketzüng jenjanga kanga mejungi kuma lir aser June ita International Monetary Fund (IMF) ajanga sen apujaka temelenshi mangur.

Ethiopia nung state of emergency sangdong

Addis Ababa, Luroi/August 04 (Agencies): Amhara region nung mitkar aser yangji aliba telungpurtem tsüngta anogo ishika khatepba sülen Ethiopia indang federal government-i Hokulbarnü state of emergency sangdongogo.

"Teti amshiba tzüzüng-ozüing nung ajemdaker iba tesüngmangtsü inyakyim azüoktsü tasak akumba ajanga state of emergency sangdongtsüsa akum," ta Ato Kilonser Abiy Ahmed indang office ajanga sangdong ka nung ashi.

Ajisüaka parnoki iba tenokdangba ya Amhara nung kisung asü linük ajanga nung agütsüar mashi.

Ethiopia nung nütsüing yongsük tsütsü jenjang tanabuba nung aliba region nung

rara ya tan hopta tetenzüklen Fano militia aser Ethiopian National Defense Force (ENDF) tsüngta tenzük aser kanga kera security crisis akum.

Fano ya part-time militia lir aser tanishir balaka mali aser parnoki kidanger Tigray region nung küm ana civil war nung federal sepaitem yaria liasü, koba taoba küm November ita tezüngzüktep ka nung tembang.

Ajisüaka Amhara indang security asoshi national government-i mezüngshiba mechi tesendaktep mejungi akum, ta ashir.

Fano züngsem aser ENDF sepaitem Debre Tabor anasa Mongulbar aser Bodhbarnü khatep, ta jila nung aliba doctor ka aser police tanishir kati osangbener dang ashi. Saka tenati security mechi tena tenüing

temai madokdaksütsü ashi.

Brehostibarnü Amhara sorkari federal ketdangsür dang teyari tali meshia liasü.

Ethiopia indang ato kilonser dangi shiti ka züluba nung, meinprongba ajanga rongsenketzüng, loktiliba aser meimchir nem teraksa tulu bener arutsür, anungji sorkari tapet mera agiang, ta shia liasü.

State of emergency sangdongba ajanga lenmangtem nokdang, transport service nung kongshir, curfew benoker aser tesem kar nung mitkar teka aiter.

Iba region nung mobile internet shibanga lir, ta yangji alirtemi ashi. Ethiopian Airlines ajanga Amhara nung airport pezü aliba nung asempi tayimtsü aoba anenja lir, ta airlines odongtar kati ashi.

Australia Open: Prannoy semi-i iogo; Sindhu, Srikanth tsükogo

Luroi/August 4, 2023 (Agencies): Tang asaya aliba Australia Open nung Hokolbarnü India nunger asayar HS Prannoy-i, Anthony Sinisuka Ginting madak takok ngua semifinal tongtetogo.

Arishi küm 31 tain India nunger asayar yagi tesülen nungi meypa arur 16-21 21-17 21-14 agi Indonesia nunger asayar madak takok ngua liasü.

Tebur kija asaya nungsa India nunger lanur asayar Priyanshu Rajawat-i Külem India nunger asayar Kidambi Srikanth 21-13 21-8 agi ayong ayonga koka pa indang career nung tang mezüngbuba Super 500 asayamung ka nung semifinals tongtetogo.

Honibarnü Semifinal asaya nung Prannoy aser Priyanshu Rajawat na asayatsü.

Ajisüaka tetsür kija asaya nung Sindhu bo USA tsür Beiwen Zhang-i tsükdaktsüogo. Iba asaya ya Zhang-i 12-21 17-21 agi koka liasü. Tena tsüngda minute 39 asaya liasü.

Sindhu-i mezüngbuba round ana nung Ashmita Chaliha aser Aakarshi Kashyap na akok ajisüaka quarter nung Zhang mekoki tsükogo.

Tebur kija asaya nung Prannoy-i mezüngbuba game-bo junga masayatet aser pa break tashi nung 6-11 agi tesülen liasü aser iba sülen Indonesia nunger asayar yagi pa nem kecha

maongka magütsüi asaya 16-21 agi akok.

Ajisüaka tanabuba game nungbo Prannoy-i tajungba asaya liasü. Asayar ana mapang ka nungbo point 9-9 ta kasa liasü saka iba sülen Prannoy-i asendenshir kanga junga asaya pa tejakdang aküm aser khen danga matsüngzüki asaya koka liasü. Maneni tasembuba game nunga Prannoy-i mezüngbuba game ana dang nungi tajungba asayateta asaya 21-14 agi akok.

Prannoy aser Rajawat na tang tashi nung khen dang asayar lir koba Prannoy-i koka lir. 2022 kübok Syed Modi International asayaba mapang Prannoy-i Rajawat koka liasü.

India tsür compound team-i WAC nung gold medal angu



New Delhi, Luroi/August 4 (Agencies): Berlin nung tang

asaya aliba World Archery Championships nung India tetsür compound archery team-i gold medal nguogo.

India tetsür compound archery team nung Jyothi Surekha Vennam, Aditi Swami, aser Parneet Kaur nunger densema lir.

Team-i final asaya nung kanga junga asaya aser Mexico team 235-229 agi koka gold medal nguogo.

India team nungi asayatem yagi iba asayamung nung parnok dak sempet tajung aliba aser asaya akoktsü atema

temulungtetba tulu aliba sayuogo. Iba asaya nung gold medal ngua linük nem konang tetushi bener arutsüba dang masü saka par aseme otsü tasen ka yangluogo, kechiyong par aseme tang mezüngbuba iba asayamung nung gold medal ngutetogo.

Final masaya tsüngda India team-i parnok dak sempet

tajung aliba sayua asayamung nung team tashi taittem koka liasü. Parnoki semifinal nung Colombia team 220-216 agi akok aser quarterfinals nung kanga meranga asayar Chinese Taipei team 228-226 agi koka liasü.

Mohun Bagan Super Giant-i Hector Yuste alizükogo

Luroi/August 4, 2023 (Agencies): Indian Super League (ISL) club Mohun Bagan Super Giant-i Spain nunger asayar Hector Yuste alizükba sangdongogo.

Spain nunger asayar ya season tasenba metenzük tsüngda Cypriot top division club AC Omonia nungi Mohun Bagan nung arua adentsü. Hector-i AC Omonia nungi asayaba mapang Cypriot Cup anaben aser 2021 küm Cypriot Super Cup kokogo.

Omonia nungi asayaba mapang Yuste, UEFA Europa League aser UEFA Europa Conference League group stage nung asayaogo. Arishi küm 35 tain central defender, shibai

defensive midfielder shilema agiteter, pai pa den tajangshiba aika bener arutsü.

Kasa mapang nung Yuste ya Spain nunga Granada, Mallorca, aser Racing Santander nunger amala club nungi asayaogo. Pa team nung züngoksemba ajanga Kolkata nung amendaker aliba club tali tashi taitba akümtsü imlar.

"Mohun Bagan Super Giant ya India nung club tejentiba rongnung ka lir. Parnoki taoba season ISL kokogo. Iba club ya linük nung club nungtugutem rongnung ka aser fan tajungtiba aliba club ka ta ni angazükogo. Spain nunger coach aser asayatem aika India nung asayaba ajanga nüburtemi jangja kümogo. Ni iba club nung

densemba atema kanga pelar aser club-i maneni takok timba nguyonga aotsü atema akokba tashi tajungtiba agütsütsü merangtsü," ta Yuste-i ashi.

Mohun Bagan Super Giant head coach Juan Ferrando-i, Yuste tajangshiba aser pa dak lenisütsü sempet aliba ajanga Mohun Bagan Super Giant kanga ajanzüktsü ta amanger.

"Hector (Yuste) ya tajangshiba aika bena aliba asayar ka lir aser pa Spanish first division nung takok ngua asayaogo. Ni pa asayaba repringogo aser pa tajangshiba aser lenisütsü atema sempet aliba ajanga Mohun Bagan Super Giant kanga ajanzüktsü ta amanger," ta Ferrando-i ashi.

Gol aser PM-i temolung agüja...

(Tapak 1 nungi...)

NESO leniri Central sorkar dang Manipur nung kin balala tsüngta mepetmesü adoka aliba süoki ia agitsü aser tarutsü tia wazüka ayutsü asoshi tensa azüoktsü atema mera agitsü ajungshia liasü.

NESO ya region nung kaketshir tentet tulutiba ama Manipur nung tensa ngua temolung shiranger, kong ita asem tashi azüdokshia aser ki o jen raksaja rakzükraktempa agi sünger arur, ta pai ashi.

Manipur nung lisopur dangi yimjung-tesunep osang sangoktsütsü nükjidong nung NESO team-i iba state semdang, ta pai ashi.

NESO ajanga asemnü Manipur semdangba mapang Meitei aser Kuki kin nungi CSO tem ajurua Imphal aser Churchandpur nung relief camp nung aliba nisungtem den sensaksema liasü, ta Yhobu-i

ashi. Manipur nung mepetmesü tenzüker NESO-i tang mezüngbuba semdanga liasü aser kin ana tsüngta arok sapang agüja ken o angatetteptsü asoshi maneni inyaktü, ta pai ashi.

Sapang dang agütsüra kin ana tsüngta mangatetep aliba tera indoka akhi ama tensa dangi arutsü, ta pai imlaba lemsatop.

Manipur nung tekeratiba nung yimjung-tesunep bener arutsü asoshi takhangba ka Manipur Governor ajanga Ato Kilonser nem NESO delegation-i agütsüogo, ta pai ashi.

Nagaland densema danga state tem nungi Manipur nung MBBS aser Agricultural University amala nung azünger aser parnok tarutsü tia asoshi shishia bilemetsür, ta NESO coordinator N. Ejanthung Nguillie-i ashi.

Iba dak sendakba nung tensa

majungba mechi Manipur yutsütsüsa akumba kaketshir aser tsürabortem dang teyari balala atema NESO dangi arutsü shia liasü.

NESO-i Manipur sorkar dang kin anaprong nungi tesem balala nung jenoka alirtem nem nungdakba oset agütsütsü ajungshia liasü, ta pai ashi.

Nok-nü aser azüdokshia ajanga tang adoka aliba tensa mazüoktetsü, anungji Manipur sorkari yimjung asoshi mera agitsüla, kechiaser Naga nunger course balala agiba kaketshir asoshi Manipur ya shisaliok tsütsü tesep ka amai lir, ta NSF tir Kegwayhun Tep-i ashi.

Pai-a NESO sentong balala nung akokba tashi nung yariteptsü molunga lir ta ashi aser Ato Kilonser dang tekeraba nung Manipur tebilemetsü asoshi mera agitsü maneni ajungshia liasü.

Nagabazar Panchayat Hall cum Parking....

(Tapak 1 nungi...)

KSCDL ajanga iba mesük nüburtem asoshi Municipal ward trok - New Market, Daklane, Midland, D. Block, Chotobosti aser North Block nung Slum Area Redevelopment kübok ki o jen yangluja liasü, ta pai ashi.

New Market Panchayat Hall cum Parking ya taoba küm renema semzük aser MoU zülutepa amshitar aser tanüngba ya December 2023 matongdang renemtsü, ta pai ashi.

Ano danga Panchayats atema operational & management

asoshi MoU züluteptsü, ta pai ashi.

Item Panchayat ki yagi Wards tem rongsen lenmang nung ajanzükba kisung masü saka nüburtem tsüngta telungjem, tangatetep aser amalitep tali akatsü imlar, ta pai ashi.

Ki o jen, lenmang aser apu amala mapang shidak nung anepalu masüba ajanga parnok arishi tatakzük shidak malir, ta pai ashi.

Mapa junga inyakba, oset

tajung amshiba aser anepaluba ajanga ki o jen mapang talanglang alir, anungji mapang shidak nung anepalutsüla, ta Theünuo-i ayongzük.

Iba sentong nung menden Nagabazar Panchayat vice chairman Keduokienyü Huozha liasü aser NBBC Pastor, Rev Kevimese Suohu-i sarasadentsü. Nagabazar Panchayat chairman, Vilasielie Solo-i tepela o jembia aser general secretary Zeneizokho Kire-i melepzüng o jembia liasü.

Manoj Tiwary cricket asaya nungi anenba sangdongogo

New Delhi, Luroi/August 4

(Agencies): Taoba mapang India cricket team nungi asayar Manoj Tiwary-i pa cricket asaya nungi anenba sangdongogo. Pa India team nung 2008 nungi 2015 tsüngda ODI 12 aser T20I asem nung asayaogo.

Pa cricket asaya aliba mapanga nunga yimden yimsüsüba nung shilem agia liasü. Pa West Bengal nung Chief Minister Mamata Banerjee lenisüba nung minister of state for sports and youth affairs kuma liasü.

Yimden yimsüsüba nung shilem agiaka cricket asayatsü jangraba mesamai pa 2022-23 domestic season nung meypa arur asaya liasü. Arishi küm 37buba nung pa Bengal team-i meypa aru aser par team final tonga ania liasü, ajisüaka parnoki final nung Saurashtra makok. Iba asaya ya Tiwary atema First-Class game tatembangbuba liasü.

Tiwary-i ODI asaya 12 nung run 287 yanglu, kong

West Indies den 2011 küm December ita Chennai nung asayaba mapang century ka yangluba densema lir.

Maneni pai First-Class career nung run 92 agi dang run 10,000 (9908 runs) metongi asaya nungi anena liasü. First-Class cricket küm 19 asayaba mapang pa indang average 48.56 liasü aser century 29 yanglua liasü. Pa mezüngbuba 2004 küm Eden Gardens nung Delhi den asaya liasü.

Pai, List A games 169 nung run 5581 yangluogo aser pa indang average 42.28 liasü.

Kasa mapang nung pa Kolkata Knight Riders'-i 2012 küm IPL akokba team nung densema liasü aser final asaya CSK den asayaba mapang pai tatembangbuba run yanglua liasü.

Tiwary ano IPL nung Delhi Daredevils, Kings XI Punjab aser Rising Pune Supergiants nungia asayaogo. Ajak senteper pa T20asaya 183 nung shilem agi aser run 3436 yanglua liasü.

BILEMDANGANG

"Tenüngdakba aser taginüba na bendangang."